

13/03/2024

Aizawl

18:30 Hrs

REGIONAL NEWS

HEADLINES:-

1. Power and Electricity Department Minister Pu F. Rodinglana'n Electric bill ba zawng zawng chu kumin March thla chungin rulh vek tum ani a ti.
2. Agriculture Minister Pu PC Vanlalruatan ZPM policy ah thlai thar lei an tih chu sawrkarin a lei tak tak tih lam ai mahin sawrkarin a pawp a hnawh zawk dawn a ti.
3. Prime Minister Narendra Modia chuan semi-conductor siamchhuahnaah India chu a hmunpui ni chho mai dawn a ti
4. Union Information and Broadcasting Minister Anurag Singh Thakura chuan vawiin khan Akashvani news leh DD News website siam thar a hawng.

<><><>

POWER - MINISTER

Power and Electricity Department Minister Pu F. Rodinglana'n Electric bill ba zawng zawng chu kumin March thla chungin rulh vek tum ani a ti.

Vawiin Assembly thutkhawm a zawhna chhangin Pu Rodinglana chuan tun dinhmunah Mizoram in eng chhitna man ba cheng vbch 144, nuai 25 sang 8760 a nei a ti a, heng hi kumin february thla ni 16 a chhinchhiah ang ani tih sawiin Generating company atangin cheng vbch 127, nuai 8 sang 9493 ani a, Transmission Company atangin cheng vbch 16, nuai 67, sing 1 sang 6173 niin NorthEast Load Dispatch Centre (NERLDC) atangin cheng nuai 49 sing 8 sang 3094 ani a ti bawk. Pu F. Rodinglana chuan Corporate lam a hawi tan tih sawiin an hmalakna engkimah intodelh phawta hmalak turin ruahmanna an siam a, coporate lam hawi veka hmalak ani a ti.

Minister chuan khawpui chhunga km 20 velah hrui hlui chu RDSS hnuaiah hrui thara thlak mek a ni a ti a, hemi vang hian Line pawh a thim zing a, mipui hriatthiamna an ngen tih sawiin theihtawpin department in hma a la a, transformer dah thar chhia te chu a chhiatna zawnchhuah tum a ni a ti a, Chhim lama electric hrui chu a hlui tawh avangin sum awm angin a thlakna ngaihtuah mek niin Thal chungin thlak zawh hman theih beisei ani a ti bawk.

Minister chuan transformer indaihlohna a nasa a ti a, sawrkar tharin cheng vbch 7 in transformer lei an tum a, a mamawh zual leh a tul zual thlak an tum tih sawiin tuna transfomer awm mek zaa 68 te chu kum 20 hma lama lei tawh niin Transfomer lifetime kum 20 pel deuh vek tawh ani a ti a, MLA Fund atangin transformer lei te pawh ngaihtuahna ah a awm tih a sawi.

P&E Minister chuan bill sang chu a system diklo deuh a awm thin a ti a, system a mumal loh deuh thin avangin tih diklo a awm thin a department in an enzui dawn tih a sawi.

<><><>

ILP INSPECTION

Hnamdang Inner Line Permit (ILP) neilo mi 1000 chuang Central YMA leh Mizoram Police tangkawp ten an man.

Nizana Aizawl khawpui huamchhuga hnam dang Inner Line Permit (ILP) nei lo enfiah runpuiah hnam dang ILP fello mi 1000 chuang man niin police station leh outpost hrang hrangah dah luh an ni.

ILP enfiah runpui hi Mizoram Police leh Central YMA kaihhruaina hnuaiah Aizawl khawpui chhunga branch YMA hrang hrang ten an kalpui a. Hnam dang ILP nei lo te hi an awmna branch YMA ten anmahni bialtu police station leh outpost-ah an dah zel a. Aizawl khawpui a Police station hrang hrang ah mi 1065 dah luh tawh niin, District hrang hrang Police Station ah mi 122 dah luh an ni bawk.

Central YMA chuan hnamdang ILP neilo dapchhuahna kawnga thawkchhuak Branch, Group leh Sub- Headquarters YMA te chungah lawmthu a sawi a, Mizoram Police nena thawhhona tha tak nei a an hmalaknaah lawmthu an sawi bawk.

Mizorama hnamdang hnathawk, ILP neilo thahnem tak an awm hi enfiah a, hmalak chhoh zel tul niin Central YMA chuan a hria a. ILP pek chhuah dan chungchang pawh enthat tul niin an hre bawk. Mizorama hmasawna hnathawktu ten an hnuaia hnathawkte pawh permit fel tak ngaihtuah sak ve turin an ngen bawk.

<><><>

AGRI MINISTER

Agriculture Minister Pu PC Vanlalruatan ZPM policy ah thlai thar lei an tih chu sawrkarin a lei tak tak tih lam ai mahin sawrkarin a pawp a hnawh zawk dawn a ti.

Vawiin session-a zawhna chhangin Agriculture Minister chuan tun hma zawngin state chhungah thlai thar rate mumal a awm ngailo a, kuthnathawktute tam tak an mangang thin a ti a, ZPM pawhin hei hi hriaiin Minimum Support Price pe turin an tlangau pui thin a, thlai thar man bithliah felfai tak siam an tum a ti a, sawrkarin a hranpaa lei lovin society khaw tina an din te chu a taka lei zawk tur an ni tih sawiin kuthnathawktuten mumal taka an thlai an hralh theihna tura ruahmanna siam a ni a ti.

Zawna dang chhangin Minister chuan kuhva chu an ngai pawimawh tih sawiin a chingtute chu a hralh kawngah an buai vaklo a ti a, kuhva chingtuten man man zawka an hralh theih nan Bana Kaih Policy hnuaiah an kalpui dawn tih a sawi bawk.

<><><>

POWER MINISTER

Power and Electricity Department Minister Pu F. Rodinglana chuan khaw tin tuama nizung chakna hmanga eng pek chu tun dinhmunah Environment lam ten rem antih chiah rihloh avangin ala harsa rih a ti.

Vawiin sessiona zawhna chhangin Pu Rodinglana chuan, Solar plant din turin tun dinhmunah Vantawng ah 10MW, North Vanlaiphai ah 20 MW leh Dilkhan Sumsuih ramah 5 MW leh Keifang Saitual bulah 10 MW hmalak a ni a ti a, heng bakah hian khaw thenkhatah hmalakna kalpui tum ani a ti a, khaw inkarah electric ban aia tower anga kalpui vek chu an duh ber tih sawiin tun dinhmunah sum indaihlohna avangin a harsa hrih tih a sawi.

Minister chuan hrui hlui chu thlak an duh a ti a, Housing for All hnuaiah engemaw zat an thlak thei dawn tih sawiin sawrkar laipuih hmalakna tur ngaihtuah mek ani a ti a, Department ah 1000 dawn post

ruak a awm tih sawiin aikal lak loh tur sawrkarin a tih avangin Linemen upa deuh deuh ten bana lawn an harsat tawh a ti a, indaihlohna a tam deuh hrih tih a sawi bawk.

<><><>

LAWNGTLAI VIRAL VIDEO

Lawngtlai District Vathuampui kawng a Concrete Pavement chhundandiklo tarlanna video nimina darh chungchang chu Sorkar chuan a ngaithutakin, a hmun ah enfiaturin PWD SDO leh JE an kal a, a tuldan angin hmalakna kalpui nghal a ni dawn.

Lawngtlaia kan corr sawi danin, Video viral hi nimin Thawhlehi a mi ni a hriat a ni a, a landan chuan kawngpuia Cement an chhun dawn hian kawngchhuata vaivut chu tihfailovin, tui pawh leihuh mumumallovin chhun deuh tawp niin a hriat a ni.

Helai kawnga Granular Sub Base(GSB) hi 125mm a chhah hi kum 2021 khan thawh zawh vek tawh a ni a, sum pawh pek vek tawh a ni, achungah Cement chhun tur hi thawh zawh mai a nihloh vangin GSB phah hian fur hnih a paltlang a, Cement chhundawn in a chhelaite chu phah nawn a, a chelolai ah pawh vailut in a khuhte tifaia Cement hi chhun chauh tur a ni.

Vathuampui kawng siamna ah hian Official ten an sawidan chuan Contractor hi Pi Lalthanthuami Chawnpui Aizawl niin cheng Nuai 2088 vel senna a ni a, hna hi August 14, 2019 ah thawhtan a ni a, hnathawh hunchhung hi vawikhat pawhsei niin, tunthla March 31 hi zawh hun tura ruahman niin, Km 20 ah Km 14.500 Concrete pavement hi thawhzawh tawh niin km 12 thawhna man pekfel tawh a ni.

<><><>

MERA PEHLE VOTE DESH KE LIYE

Kum 18 tling thar mai tur te leh tling tawh, Electoral Roll-a hming la ziaak lut lo te inziaak luta Lok Sabha inthlanah vote an thlak ngei theih nana fuih phurna - 'Mera Pehla Vote, Desh Ke Liye' chu kalpui mek a ni a.

Lok Sabha inthlan vawi 18-na lo awm turah hian a tam thei ang berin vote an thlak theih nan ngawrh taka hmalak a ni a, kawng hrang hrangin mi pawimawh leh challangten mipuite vote thlak turin an sawm a ni.

Ministry of Information and Broadcasting buatsaih 'Mera Pehla Vote Desh Ke Liye' hnuaiah hian ram chhunga vote thlak thei zinga a tam thei ang berin vote an thlak theih nan ruahmanna siam a ni a, kum 18 tling thar ten vote an thlak ngei theih nan beihpui thlakin a tam thei ang bera theh darh mek a ni.

<><><>

PM

Prime Minister Narendra Modia chuan semi-conductor siamchhuahnaah India chu a hmunpui ni chho mai dawn a ti.

Wawiina cheng vaibelchhe nuai 1.25 senna tur semiconductor project pathum dinna lung a phumnaah PM Modia chuan he thu hi a sawi a. Wawiina semiconductor siamna turte hi Dholera Special Investment Region (DSIR), Gujarat, Outsourced Semiconductor Assembly and Test (OSAT) facility Assam-a Morigaon te leh Outsourced Semiconductor Assembly and Test (OSAT) facility Gujarat-a Sanand amite an ni a. Pu Modia chuan thalaiten semiconductor industry atangin hlawkna tam tak an chhar dawn a ni a

ti a. Chip manufacturing chuan India chu mahni intodelh leh changkanna kawng a zawh tir dawn a ni.

<><><>

UNION I&B

Union Information and Broadcasting Minister Anurag Singh Thakura chuan vawiin khan Akashvani news leh DD News website siam thar a hawng. Hei bakah hian Pu Thakura hian News on AIR app thar a hawng baw a. Prasar Bharati in audio-visual chi hrang hrang a thehdarhna tur 'Shabd' a tlangzarh baw a ni.

<><><>

Haryana CM

Haryana Chief Minister thar Nayab Singh Saini chaun vawiin khan Assembly ah sawrkar bukna a paltlang. Pu Saini-a kaihhruai sawrkar hi vawiin khan Special Assembly session ah buk a ni a. Darkar 2 chuang sawiho anih hnuah voice vote hmangin sawrkar hian bukna a paltlang a ni.

<><><>